

**Jan Rivart**

# Jimmy

**Rouman**

**Revira dóu picard pèr Peireto Berengier**



**C.I.E.L. d'Oc**

*Centre International de l'Écrit en Langue d'Oc*

# I

## L'ourtensia

Lou jour que sa femo Margarido pleguè parpello -un plurèsi de nàni qu'avié mau vira- Ouscar s'èro jura que i'aurié plus jamai de plaço pèr degun dins soun cor.

Ouscar Lermusiaux manjo dins si seissanto-vuech an. Pensiouna de l'Arsenau de Cuesmes, viéu tout soulet despièi qu'es véuse. Marrida à vinto sièis an emé Margarido Cuvelier, venien de festeja si noço d'argènt quouro lou malur li venguè dessepara. Fai d'acò quinge an.

Quouro avès viscu à dous mai de vinto cinq an de tèms, sènso garrouio, à dire lou vrai sènso jamai ges de nivoulet, e que dins un rènn de tèms vous arretroubas soulet, coume coupa à mita, i'a dequé n'en mouri; n'avès lou cor trenca. D'aiours lou proumié sentimen d'Ouscar, èro bèn esta de metre fin à si jour e pièi pas mai.

S'aguèsse pas agu l'ourtensia, èro causo facho. Uno pauro pichoto planto de rènn i'avié, se pòu dire, sauva la vido.

Sourti de l'espitau, ounte venien de barra l'atahut avant de remanda Margarido au siéu, Ouscar anavo à gràndi cambado, que plouravo coume un pichot, pèr arriba avans lou gourbeiard. Avié pas vougu mounta à coustat dóu caufaire que i'èro vengudo l'idèio que falié reçaupre Margarido emé de flour. Poudié pas tourna à l'oustau ansin, sènso flour, oh que noun!

Èro divèndre, Ouscar passè de la plaço ounte se tenié coume à l'acoustumado lou marcat. Veguè un bèl ourtensia de cinq tèsto tout blu. Lou blu, èro tout bèu just la coulour preferido de sa pauro femo que reveirié plus.

Pus jamai? Oh, si pamens! En sarrant lou vase dins si bras, coume se fuguèsse Margarido elo-memo, Ouscar, quàsi à-z-auto voues, countavo i flour li négri proujèt que ié cafissien sa tèsto brulanto de charpin. Passa l'enterramen, desbarassa dóu mounde, ami e famiho, s'anarié alonga sus la toumbo ounte aurié planta l'ourtensia.

Si lagremo bagnavon li flour.

Jagu ansin, farié quand meme uno preguiero pèr demanda perdoun au Bon Diéu, pièi empassarié ço que fau pèr s'endourmi à jamai.

Venié just de rintra dins l'oustau que lou gourbeiard arribavo à soun tour. Eugenio, uno cousino de Margarido, èro aqui emé soun ome Gastoun, pèr presta la man. Ouscar aurié miés ama que i'aguèsse degun em'èu pèr reçaupre sa femo, que l'esperavo emé si flour.

Margarido, li flour e éu...